

हाथ बज्र औ ध्वजा बिराजै। काँधे मूँज जनेऊ साजै॥  
 संकर सुवन केसरीनन्दन। तेज प्रताप महा जग बंदन॥  
 बिद्यावान गुनी अति चातुर। राम-काज करिबे को आतुर॥  
 प्रभु-चरित्र सुनिबे को रसिया। राम लखन सीता मन बसिया॥  
 सूक्ष्म रूप धरि सियहिं दिखावा। बिकट रूप धरि लंक जरावा॥  
 भीम रूप धरि असुर सँहारे। रामचन्द्र के काज सँवारे॥  
 लाय सजीवन लखन जियाये। श्रीरघुबीर हरषि उर लाये॥  
 रघुपति कीन्ही बहुत बड़ाई। तुम मम प्रिय भरतहि सम भाई॥  
 सहस बदन तुम्हरो जस गावैं। अस कहि श्रीपति कंठ लगावैं॥  
 सनकादिक ब्रह्मादि मुनीसा। नारद सारद सहित अहीसा॥  
 जम कुबेर दिगपाल जहाँ ते। कबि कोबिद कहि सके कहाँ ते॥  
 तुम उपकार सुग्रीवहिं कीन्हा। राम मिलाय राज पद दीन्हा॥  
 तुम्हरो मन्त्र बिभीषन माना। लंकेस्वर भए सब जग जाना॥  
 जुग सहस्र जोजन पर भानू। लील्यो ताहि मधुर फल जानू॥  
 प्रभु मुद्रिका मेलि मुख माहीं। जलधि लाँघि गए अचरज नाहीं॥  
 दुर्गम काज जगत के जेते। सुगम अनुग्रह तुम्हरे तेते॥  
 राम दुआरे तुम रखवारे। होत न आज्ञा बिनु पैसारे॥  
 सब सुख लहै तुम्हारी सरना। तुम रच्छक काहू को डर ना॥  
 आपन तेज सम्हारो आपै। तीनों लोक हाँक तें काँपै॥  
 भूत-पिसाच निकट नहिं आवै। महाबीर जब नाम सुनावै॥  
 नासै रोग हरे सब पीरा। जपत निरंतर हनुमत बीरा॥  
 संकट तें हनुमान छुड़ावै। मन क्रम बचन ध्यान जो लावै॥